

唐
音
統
籤

丁籤十六劉長卿之九

唐音統籤卷

二百三十九

七言律詩

上陽宮望幸

玉輦西巡久未還春光猶入上陽間
萬木長承新雨露千門空對舊河山
深花寂寂宮城閉細草青青御路閒
獨見彩雲飛不盡只應來去候龍顏

賦得閨人遯思

御覽詩作皇甫冉

鶯啼燕語報新年馬邑龍沙路幾千
家住秦城臨漢苑心隨明月到胡天
機中錦字論長恨樓上花枝笑獨眠
爲問元戎寶車騎何時返旆勒燕然

感懷

秋風

青楓一作落葉

正堪悲黃菊殘花欲待誰水近偏

逢寒氣早山深常見日光遲愁中卜命看周易夢

裏招魂讀楚詞自笑不如湘浦鴈飛

一作春

來卽是

北歸時

溫湯客舍

冬狩溫泉歲欲闌宮城佳氣晚宜看湯熏仗裏千

旗暖雪照山邊萬井寒君門獻賦誰相達客舍無

錢輒自安且喜禮闈秦鏡在還將妍醜付春官

北歸入至德界偶逢洛陽隣家李光宰

生涯心事已蹉跎舊路依然此重過近北始知黃
葉落向南空見白雲多炎州日日人將老寒渚年
年水自波華髮相逢俱若是故園秋草復如何

登松江驛樓北望故園

淚盡江樓北望歸田園已陷百重圍平蕪萬里無

一作何

人去落日千山空鳥飛孤舟漾漾寒潮小極

浦蒼蒼遠樹微白鷗漁父徒相待未掃攬櫓懶息
機

岳陽樓

見滕宗諒岳陽樓
石刻疑偽作也

行盡清溪日已蹉雲容山影兩嵯峨樓前歸客怨

秋夢湖上美人疑夜歌獨坐高高風勢急平湖渺
渺月明多終期一艇載樵去來往片帆愁白波

登餘干古縣城

孤城上與白雲齊萬古荒涼楚水西官舍已空秋
草綠女牆猶在夜烏啼平江渺渺行人度落日亭
亭向客低沙鳥不知陵谷變朝來一作暮去弋陽
溪

赴南中題褚少府湖上亭子

一作李嘉祐詩

種田東郭傍春陂萬事無情把釣絲綠竹放侵行
徑裏青山常對捲簾時紛紛花落門空閉寂寂鶯

啼日更遲從此別君千萬里白雲流水憶佳期

將赴嶺外留題蕭寺遠公院

寺卽梁朝蕭內史創

竹房遙閉上方幽苔經蒼蒼訪昔遊內史舊山空
日暮南朝古木向人秋天香月色同僧室葉落猿
啼傍客舟此去播遷明主意白雲何事欲相留

長沙過賈誼宅

三年謫宦此樓遲萬古惟留楚客悲秋草獨尋人
去後寒林空見日斜時漢文有道恩猶薄湘水無

情弔豈知

劉辰翁云怨甚

寂寂江山搖落處憐君何事到

天涯

聊賦庚子日斜鵬集子舍又云野鳥入室主人將去徐與公極稱三四使事融化的妙

上巳日越中與鮑侍郎泛舟耶溪

蘭橈綬

一作萬

轉傍汀沙應接雲峰到若耶舊浦蒲

來移渡口垂楊深處有人家永和春色千年在曲
水鄰心萬里賒君見漁船時借問前洲幾路入桃
花

三日李明府後亭泛舟

一作皇
甫冉詩

江南風景復如何聞道新亭更欲過處處紉蘭春
浦綠萋萋藉草遠山多壺觴須就陶彭澤時俗猶
傳晉永和更待持橈徐轉去微風落日水增波

尋龍井楊老

柴門草舍絕風塵空谷耕田學子真
泉咽豈勞經隴坻山深不覺有秦人
手栽松樹蒼蒼老身卧桃源寂寂春
唯有胡麻當雞黍白雲來往未嫌貧

獻淮寧軍節度李相公

建牙吹角不聞喧三十登壇衆所尊
家散萬金酬士死身留一劍答君恩
漁陽老將多迴席魯國諸生半在門
白馬翩翩春草綠邵陵西去獵平原

觀校獵上淮西相公

龍驤校獵邵陵東野火初燒楚澤空
師事黃公千載後身騎白馬萬人中
笳隨晚吹吟邊草箭沒寒

雲落塞鴻三十擁旄誰不羨周郎少小立奇功

漢陽獻李相公

退身高卧楚城幽獨掩閒門漢水頭春草雨中行

徑沒暮山江上捲簾愁幾人猶憶

一作識

孫弘閣直

口同乘范蠡舟早晚却還丞相印十年空被白雲

留

罪所上御史惟則

誤因微祿滯南昌幽繫國扉晝夜長黃鶴翅垂回

鷺雀青松心在任風霜斗間誰與看冤氣盆下無

由見太陽賢達不能同感激更於

一作令

何處問蒼

蒼

喜朱拾遺承恩拜命赴任上都

詔書徵拜脫荷裳身去東山閉草堂
闔闔九天通奏籍華亭一鶴在朝行
滄洲離別風煙遠青瑣幽深漏刻長
今日却迴垂釣處海鷗相見已高翔

謫官後卧病官舍簡賀蘭侍御

一作聚睦州和庸見贈

青春衣繡正相宜白首垂絲恨不遺
江上幾回今夜月鏡中無復少年時
生還北闕誰相引老向南邦衆所悲
歲歲任他芳草綠長沙未有定歸期

自江西歸至舊任官舍贈袁贊府

時經劉展平後

却見同官喜復悲此生何幸有歸期空庭客至逢
搖落舊邑人稀經亂離湘路來過迴鴈處江城卧
聽搗衣時南方風土勞君問賈誼長沙豈不知

初聞貶謫續喜

一本無上六字

量移登干越亭贈鄭

校書

青青草色滿江洲萬里傷心水自流越鳥豈知南
國遠江花獨向北人愁生涯已逐一作滄浪去一作
老冤氣初逢渙汗收何事還邀遷客醉春風日暮
待歸舟

和樊使君登潤州城樓

山城迢遞敞高樓
露冕吹鐃居上頭
春草連天隨北望
夕陽浮水共東流
江田漠漠全吳地
野樹蒼蒼故蔣州
王粲曾爲南郡客
別來無處更銷憂

奉酬辛大夫喜湖南臘月連日降雪見示之

作

長沙耆舊拜旌麾
喜見江潭積雪時
柳絮三冬先北地
梅花一夜遍南枝
初開窻閣寒光滿
欲掩軍城暮色遲
間里何人不相慶
萬家同唱郢中詞

酬屈突陝

落葉紛紛滿四隣
蕭條環堵絕風塵
鄉看秋草歸

無路家對寒江病且貧
藜杖懶迎征騎客
菊花能醉去官人
憐君計畫誰知者
但見蓬蒿空沒身

秋夜有懷高三十五適兼呈空上人

一作皇甫

曉節逢君趣道深
結茆栽樹近東林
吾師幾度曾摩頂
高士何年遂發心
北渚三更聞過鴈
西城萬里動寒砧
不見支公與玄度
相思擁膝坐長吟

自夏口至鸚鵡洲夕望岳陽寄元中丞

江洲無浪復無煙
楚客相思益渺然
漢口夕陽斜渡鳥
洞庭秋水遠連天
孤城背嶺寒吹角
獨戍臨江夜泊船
賈誼上書憂漢室
長沙謫去古今憐

聞虞汴州有替將歸上都登漢東城寄贈
淮南搖落客心悲潁水悠悠怨別離
早鴈初辭舊關塞秋風先入古城池
腰章建隼皇恩賜露冕臨人白髮垂
惆悵恨君先我去漢陽耆老憶旌麾

歲日
曆因寄都官裴郎中

青陽振蟄初頒曆白首銜冤欲問天
絳老更能經幾歲賈生何事又三年
愁占著草終難決病對椒花倍自憐
若道平分四時氣南枝爲底發春偏

使次安陸寄友人

新年草色遠萋萋久客將歸問失一作路
蹊暮雨不

知濱口處春風只到穆陵西孤城盡日空花落三
戶無人自鳥啼君在江南相憶否門前五柳幾枝
低

春望寄王泠陽

亦見岳陽
右刻疑僞

清明別後雨晴時極浦空顰一望眉湖畔春山煙
點點雲中遠樹墨離離依微水成聞鉦鼓掩映沙
村見酒旗風煖草長愁自醉行吟無處寄相思

西陵寄一上人

東山詩道成開士南渡隋陽作本師了義慧心能
善誘吳風越俗罷滯祠室中時見天人命物外長

懸海歎期多謝清言異玄度懸河高論有誰持

避地江東留別淮南使院諸公

長安路絕鳥飛通萬里孤雲西復東舊業已應成
茂草餘生只是任飄蓬何辭向物開秦鏡却使他
人得楚弓此去行持一竿竹等閑將狎釣魚翁

別嚴士元

春風倚棹闌間城水國春寒陰復晴細雨濕衣看
不見閒花落地聽無聲日斜江上孤帆影草綠湖
南萬里情東道若逢相識問青袍今已誤儒生

江州重別薛六勳八二員外

生涯豈料承優詔世事空知學醉歌江上月明胡
鴈過淮南木落楚山多寄身且喜滄洲近顧影無
如白髮何今日龍鍾人共棄媿君猶遣嶺風波

餞王相公出牧括州

緡雲詎比長沙遠出牧猶承明主恩城對寒山開
畫戟路飛秋葉轉朱轡江潮淼淼連天望旌旆悠
悠上嶺翻蕭索庭槐空閉閣舊人誰到翟公門

送柳使君赴袁州

宜陽出守新恩至京口因家始願違五柳開門高
士去三苗按節遠人歸月明江路聞猿斷花驄山

城見吏稀惟有郡齋窓裏岫朝朝空對謝玄暉

送崔使君赴壽州

列郡專城分國憂影蟾息蓋古諸侯仲華遇主年
猶少公瑾論功位已酬草色青青迎建隼蟬聲處
處雜鳴騶千里相思如可見淮南木葉正驚秋

送台州李使君兼寄題國清寺

露冕新承明主恩山城別是武陵源花間五馬時
行縣山外千峰常在門晴江洲渚帶春草古寺山
松深暮猿知到應真飛錫處因君一想已忘言

送盧侍御赴河北

月言終
謫居爲別倍傷情何事從戎獨遠行千里按圖收
故地三軍罷戰及春耕江天渺渺鴻初去漳水悠
悠草微生莫學仲連逃海上田單空媿取聊城

送孔巢父赴河南軍

按此詩皇甫冉所作

江南相送隔煙波况復新秋一鴈過聞道全軍征
北虜又言諸將會南河邊心冉冉鄉人絕寒色青
青戰馬多共許陳琳工奏記知君名行未蹉跎

送宇文遷明府赴洪州張觀察追攝豐城令

時長卿亦

在此州

送君不復遠爲心余亦扁舟湘水陰路逐山光何

處盡春隨草色向南深陳蕃待客應懸榻
必賤之官獨抱琴僮見主人論謫宦爾來空有白頭吟

送開府姪隨故李使君旅櫬却赴上都

征西諸將莫如君報德誰能不顧勲身逐塞鴻來
萬里手披江草訪孤墳擒生絕漠經胡雪懷舊長
沙哭楚雲歸去蕭條霸陵上幾人看葬李將軍

送耿拾遺歸上都

若爲天畔獨歸秦對水看山欲暮春窮海別離無
限路隔河征戰幾歸人長安萬里傳雙淚建德千
峰寄一身想到鄴亭愁駐馬不堪西望見風塵

送皇甫曾赴上都

東遊久與故人違
西去荒涼舊路微
秋草不生三徑處
行人獨向五陵歸
離心日遠如流水
迴首川長共落暉
羣豈勞傷此別滄江欲暮自沾衣

送陸澧倉曹西上

長安此去欲何依
先達誰當薦陸機
日下鳳翔雙闕迥
雪中人去二陵稀
舟從故里難移棹
家住寒塘獨掩扉
臨水自傷流落久
贈君空有淚沾衣

送侯中丞流康州

長江極目帶楓林
疋馬孤雲不可尋
遷播共知臣

道枉猜讒却爲主恩深轅門畫角三軍思驛路青
山萬里心北闕九重誰許屈獨看湘水淚沾襟

送馬秀才落第歸江南

南客懷歸鄉夢頻東門悵別柳條新慙慙十酒城
陰暮蕩漾孤舟楚水春湘竹舊斑思帝子江蘿初
縵怨驪人憐君此去未得意陌上愁看淚滿巾

送常十九歸嵩少故林

迢迢此恨杳無涯楚澤嵩丘千里除岐路別時驚
一葉雲林歸處憶三花秋天蒼翠寒飛鴈古堞蕭
條晚噪鷗他日山中逢勝事桃源洞裏幾人家

送孫逸歸廬山

得帆字

鐘峰絕頂楚雲銜
楚客東歸棲此巖
彭蠡湖邊香橘柚
潯陽郭外暗楓杉
青山不斷三湘道
飛鳥空隨萬里帆
常愛此中多勝事
新詩他日竹間緘

送楊於陵歸宋州別業

半山灑雨帶斜暉
向水殘花映客衣
旅食嗟余當歲晚
能文似汝少年稀
新河柳色千株暗
故國雲帆萬里歸
離亂安知君到處
寄書須及鴈南飛

送李錄事兄歸襄鄧

十年多難與君同
幾處移家逐轉蓬
自昔相逢知

戰後青春已過亂離中行人杳杳看西月歸馬蕭蕭向北風漢水楚雲千萬里天涯此別恨無窮

鄆上達華司士歸上都舊業

司士卽鄭公之孫頃客於鄆上

前朝舊業想遺塵今日他鄉獨爾身
鄆地國除爲過客杜陵家在有何人
蒼苔白露生三徑古木寒蟬滿四鄰
西去茫茫問歸路關河漸近淚盈巾

此去茫茫盡秋草
離心萬里逐征輪

青溪口送人歸岳州

洞庭何處鴈南飛江萸蒼蒼客去稀
帆帶夕陽千里沒天連秋水一人歸
黃花裊露開沙岸白鳥啼

魚上釣磯岐路相逢無可贈老年空有淚沾衣

送子瞻罷貲甫歸長城

送君卮酒不成懽幼女辭家事伯鸞桃李宜人誠
可詠柳花如雪若爲看心憐稚齒鳴環去身媿衰
翁對主難惆悵暮帆何處落青山無限水漫漫

遊惠法師遊天台因懷智大師故居

華嚴瀑水知何在鳥道猿啼過幾重落日獨搖金
鏡去深山誰向石橋逢定攀巖下叢生桂欲買雲
中若箇峰憶想東林禪誦處寂寥惟聽舊時鍾

送靈澈上人還越中

禪客無心杖錫還
沃洲深處草堂閑
身隨敝屣經殘雪
手綻寒衣入舊山
獨向青溪依樹下
空留白日在人間
那堪別後長相憶
雲木蒼蒼但閉關

戲題贈二小男

異鄉流落頻生子
幾許悲歡併在身
欲並老容羞白髮
每看兒戲憶青春
未知門戶誰堪主
且免琴書別與人
何幸暮年方有後
舉家相對却沾巾

獄中聞收東京有赦

傳聞闕下降絲綸
爲報關東滅虜塵
壯士已憐成白首
餘生猶待發青春
風霜何事偏傷物
天地無

情亦愛人持法不須張密網恩波自解惜枯鱗

哭陳使君

千秋萬古其平原唯有清風及子孫
旅櫬歸程傷道路舉家行哭向田園
寒山搖落空殘壠故里踈蕪獨掩門
儒行公才更何用欲將修短問乾坤

一作

千秋萬古葬平原素業清風及子孫
旅櫬歸程傷道路舉家行哭向田園
空山寂寂開新壠喬木蒼蒼掩舊門
儒行公才竟何在獨憐棠樹一枝存

雙峰下哭故人李宥

憐君孤壠寄雙峰埋骨窮泉復幾重
白露空沾九原草青山猶閉數株松
圖書經亂知何在妻子因

貧失所從惆悵東臯却歸去人間無處更相逢

過裴舍人故居

慘慘天寒獨掩扉紛紛黃葉滿空庭孤墳何處依
山木百口無家泛水萍籬花猶及重陽發鄰笛那
堪落日聽書幌無人長不捲秋來芳草自爲螢

題靈祐和尚故居

歎逝翻悲有此身禪房寂寞見流塵六時行徑空
秋草幾日浮生哭故人風竹自吟遙入磬雨花隨
淚共沾巾殘經窓下依然在憶得山中問許詢

見故人李均所借古鏡恨其未獲歸府斯人

已亡愴然有作

故人留鏡無歸處今日懷君試暫疑
歲久豈堪塵自入夜長應待月相隨
空憐瘦樹曾歸屋猶見菱花獨映池
斯恨平生還不早如今始挂龍頭枝

丁籤十六劉長卿之十

唐音統籤卷

二百四十

五言絕句

平蕃曲

三首

吹角報翻營迴軍欲洗兵已教青海外自築漢家城

渺渺成煙孤茫茫塞草枯隴頭那用閉萬里不防胡

絕漠大軍還平沙獨戍閑空留一片石萬古在燕山

湘妃

帝子不可見
秋風來暮思
嬋娟江上月
千載空蛾眉

春草宮懷古

君王不可見
芳草舊宮春
猶帶羅裙色
青青向楚人

恭輿灣北答崔載華問

荒涼野店絕
迢遞人煙遠
蒼蒼古木中
多是隋家苑

正朝覽鏡作

憔悴逢新歲
茅扉見舊春
朝來明鏡裏
不認白頭人

江中對月

人
鐘洲夕煙欽望月秋江暮塵塵沙上人月中孤渡
水

赴楚州次白田途中阻淺問張南史

楚城今近遠積霜寒塘暮水淺舟且遲淮潮至何
處

過白鶴觀尋岑秀才不遇

不知方外客何事鎖空房應向桃源裏教人喚阮

耶

逢雪宿芙蓉山主人

日暮蒼山遠天寒白屋貧柴門聞犬吠風雪夜歸人

夜中對雪贈秦系時秦初與謝氏離婚謝氏在越

月明花滿地君自憶山陰誰遣因風起紛紛亂此心

秦系頃以家事獲謗因出舊山每荷觀察崔公見知欲歸未遠感其流寓詩以贈之

初述武陵路復出孟嘗門迴首江南岸青山與舊

恩

贈秦系徵君

群公誰讓位五柳獨知貧
惆悵青山路煙霞老此人

寄龍山道士許法稜

悠悠白雲裏獨住青山客
林下晝焚香桂花同寂寂

瓜州道中送李端公南渡後歸揚州道中寄
片帆何處去匹馬獨歸遲
惆悵江南北青山欲暮時

唐詩集卷之四
送張超崔載華之閩中

朝無寒士達家在舊山貧相送天涯裏憐君更遠人

送張十八歸桐廬

歸人乘野艇帶月過江村正落寒潮水相隨夜到門

送子婿崔貢甫李穆往揚州四首

渡口發梅花山中動泉脉蕪城春草生君作揚州客

半邏鶯滿樹新年人獨還落花逐流水共到茱萸

灣

雁還空渚在人去落潮翻臨水獨揮手殘陽歸掩門

狎鳥携稚子釣魚終老身殷勤囑歸客莫話桃源人

送靈澈上人

蒼蒼竹林寺杳杳鐘聲晚荷笠帶夕陽青山歸遠

送方外上人

孤雲將野鶴豈向人間住莫買沃州山時人已知

處

斑竹

蒼梧千載後斑竹對湘沅
欲識湘妃怨枝枝滿淚痕

入百丈澗見桃花晚開

百丈深澗裏過時花欲妍
應緣地勢下遂使春風

偏與前五古三韻大同小異

遊南國偶見在陰牆下葵因以成詠

此地常無日青青獨在陰
太陽偏不及非是未傾

心

六言絕句

尋張逸人山居

危石纔通鳥道空
山更有人家桃源定在深處澗
水浮來落花

發越州赴潤州使院留別鮑侍御

對水看山別離孤舟日暮行遲
江南江北春草獨向金陵去時

送陸禮還吳中

瓜步寒潮送客楊柳暮雨沾衣
故山南望何處秋草連天獨歸

七言絕句

昭陽曲

昨夜承恩宿未央
羅衣猶帶御爐香
一作衣芙蓉帳

小雲屏暗楊柳風
多水殿涼

春日宴魏萬成湘水亭

何年家住此江濱
幾度門前北渚春
白髮亂生相顧老
黃鶯自語豈知人

過鄭山人所居

寂寂孤鶯啼杏園
寥寥一大吠桃源
落花芳草無尋處
萬壑千峰獨閉門

尋盛禪師蘭若

秋草黃花覆古阡，隔林何處起人煙。山僧獨在山

中老，唯有寒松見少年。

劉辰翁云：度宛。

時平後春日思歸

一尉何曾及布衣，時平却憶臥柴扉。故園柳色催

新息道中作

蕭條獨向汝南行，客路多逢撲騎營。古木蒼蒼離

亂後，幾家同住一孤城。

奉使鄆渚至烏江道中作

滄洲不復戀漁竿白髮那堪帶鐵冠客路向南何處是蘆花千里雪漫漫

使廻赴蘇州道中作

春風何事遽相催路盡天涯始却廻萬里無人空楚水孤帆送客到蘇臺

使還七里瀨逢薛承規赴江西貶

遷客歸人醉晚寒孤舟暫泊子陵灘離幃君更去三千里落日青山江上看

聞奉迎皇太后使沈判官至因有此作

后僖宗皇

帝昇也安史之亂失於東都帝即位分命使臣周行天下求訪終不解

長樂宮人掃落花君王正候五雲車萬方臣妾同
瞻望疑在曾城阿母家

同崔載華贈日本聘使

憐君異域朝周遠積水連天何處通遙指來從初
日外始知更有扶桑東

贈崔九載華

憐君一見一悲歌歲歲無如老去何白屋漸看秋
草沒青雲莫道故人多

贈秦系

向風長嘯戴紗巾野鶴由來不可親明日東歸變

名姓五湖煙水覓何人

贈微上人

禪門來往翠微間
萬里千峰在剡山
何時共到天
台裏身與浮雲處處閒

酬李穆見寄

孤舟相訪至天涯
萬轉雲山路更賒
欲掃柴門迎
遠客青苔黃葉滿貧家

劉后村云魏野林逋不能及也

會赦後酬主簿所問

江南海北長相憶
淺水深山獨掩扉
重見太平身
已老桃源久住不能歸

酬靈微公相招

石磻泉聲久不聞
獨臨長路雪紛紛
如今漸欲生黃髮
願脫頭冠與白雲

寄許尊師

獨上雲梯入翠微
濛濛煙雪映巖扉
世人知在中華裏
遙禮青山恨不歸

寄別朱拾遺

天書遠召滄浪客
幾度臨岐病未能
江海茫茫春欲遍
行人一騎發金陵

將赴南巴至餘干別李十二

江上花傳問禮人
鄱陽鶯報越鄉春
誰憐此別悲
歌異萬里青山送逐臣

瓜洲驛重經梁郎中赴吉州

渺渺雲山去幾重
依依獨聽廣陵鐘
明朝借問南來客
五馬雙旌何處逢

送建州陸使君

漢庭初拜建安侯
天子臨軒寄所憂
從此向南無
限路雙旌一去水悠悠

奉送賀若郎中賊退後之杭州

江上初收戰馬塵
鶯聲柳色待行春
雙旌誰道來

何暮萬井如今有幾人

送王司馬秩滿西歸

漢主何時放逐臣
江邊幾度送歸人
同官歲歲先辭滿
唯有青山伴老身

送李判官之潤州行營

萬里辭家事
鼓聲金陵驛
路楚雲西江
春不肯留

行

一作

客草色青青送馬蹄

送陶十赴杭州攝掾

莫歎江城一掾卑
滄洲未是阻心期
浙中山色千萬狀
門外潮聲朝暮時

重送裴郎中貶吉州

猿啼客散暮江頭，人自傷心水自流。
同作逐臣君更遠，青山萬里一孤舟。

送秦侍御外甥張篆之福州謁鮑大夫秦侍
御與大夫有舊

萬里閩中去渺然，孤舟海

一作水

上入寒煙，轅門拜

首，儒衣弊貌似牢之，豈不憐

送劉萱之道州謁崔大夫

沅水悠悠湘水春，臨期南

一作

望一沾巾，信陵門

下三千客，君到長沙見幾人

送李穆歸淮南

揚州春草新年綠未去先愁去不歸
淮水問君來早晚老人偏畏過芳菲

東湖送朱逸人歸

山色湖光併在東扁舟歸去有樵風
莫道野人無外事開田鑿井白雲中

舟中送僧

釋子身心無垢紛獨將衣鉢去人群
相思晚望西林寺唯有鐘聲出白雲

重送道標上人

衡陽千里去人稀
遙逐孤雲入翠微
春草青青新覆地
深山無路若爲歸

七里灘重送嚴維

秋江渺渺水空波
越客孤舟欲榜歌
手折衰楊悲老大
故人零落已無多

罪所留繫每夜聞長洲軍笛聲

白日浮雲閉不開
黃沙誰問冶長猜
只憐橫笛關山月
知處愁人夜夜來

家園瓜熟是故蕭相公所遺
瓜種悽然感舊因賦此詩

事去人亡跡自留黃花綠帶不勝愁誰能更向青
門外秋草茫茫覓故候

丁籤十七

唐音統籤卷一百四十一

錢起字仲文吳興人天寶十年登進士第釋褐秘書省校書郎大曆中與韓翃李端輩十人俱以能詩出入貴遊之門號十才子形於圖畫位終尚書考功郎時郎士元亦以詩名人爲之語曰前有沈宋後有錢郎朝廷公卿出牧奉使起與士元或無詩祖行人以爲耻焉唐藝文志詩一卷宋志十一

卷

陳氏書錄云蜀本前後集十三卷

今定爲九卷

江行絕句百首今改正入錢翊

集翊卽起曾孫也詳戊籤高仲武曰員外詩格新奇理致清贍粵從登第擬題詞林文宗右丞許以高格右丞沒後員外爲雄芟齊宋之浮游削梁陳之靡曼邈然獨立莫之與京且如鳥道掛疎雨

人家殘夕陽又半山小煙水隔林深又長
鐘聲花外盡龍池柳色雨中深皆特出意表標準
古今又窮達總明主耕桑亦近郊則禮義
克全忠孝兼著足以弘長名流爲後楷式

五言古詩一

秋館言懷

蟋蟀已秋思蕙蘭仍碧滋蹉跎獻賦客歎息此良
時日夕雲臺下商歌空自悲

秋夜作

萬計各無成寸心日悠漫浮生竟何窮巧曆不能
笑流落四海間辛勤百年半商歌向秋月哀韻兼
浩歎寤寐怨佳期美人隔霄漢寒雲度窮水別業

繞垂幔窓中問談難長夜何時旦

小園招隱

支離鮮兄弟形影如手足但遂飲米節其辭代耕
麻斑衣在林巷始覺無羈束交柯低戶陰閑鳥將
雛宿窮通世情阻日夜蒼徑綠誰言北郭貧能分
粳粳粟

縣內水亭晨興聽訟

晨光起宿露池上判黎甿借問秋泉色何如拙宦
情磨鉛磨利用策蹇愁前程昨夜明月滿中心如
鵲驚負恩時易失多病續難成坐惜寒塘晚霜風

吹杜鵑

南中春意

入仕無知言避方隨世道平生願開濟遇物千懷
抱已阻青雲期甘同散樗老客遊南海曲坐見韶
陽蜚聲國朝佳人他鄉思芳華惜無鵝鵲翅安得
凌蒼昊

海畔秋思

匡濟難遺合去留隨興衰偶爲謝客事不顧平子
田魏闕賁翹楚此身長素捐箕裘空在念拙拙誰
推賢無用卽明代養病仍壯年日夕望佳期帝鄉

路幾千秋風晨夜起零落愁芳華

太子李舍人城東別業俯視川林前帶雷岫
南山轉群木昏曉擁山翠小澤近龍居青蒼常雨
氣君家北原上千金買勝事丹闕退朝迴白雲迎
賞至新晴村落外處處煙景異片水明斷岍餘霞
入古寺東臯指歸翼目盡有餘意

太子李舍人城東別業與二三文友避暑

下馬失炎暑重門深綠篁宮臣禮嘉客林表開蘭

堂茲夕興難盡登臺照墨場

此下一本有鮮風吹
印紋客坐皆馨香美

景惜文會清吟
進羽觴四句

東陵晚來好目極趣何長鳥道掛

疎雨人家殘夕陽城隅擁歸騎留醺戀瓊一作芳

李士曹廳對雨

春雨暗重城訟庭深更寂終朝人吏少滿院煙雲
集濕鳥壓花枝新苔宜砌石掾曹富文史清興對
詞客愛爾蕙蘭叢芳香飽時澤

苦雨憶皇甫冉

涼雨門巷深窮居成習靜獨吟愁霖雨更使秋思
永疲病苦昏墊日夕開軒屏草木森已悲衾幃清
且冷如何遊宦客江海隨泛梗延首長相思憂襟
孰能整

雨中望海上懷鬱林觀中道侶

山觀海頭雨懸沫動烟樹只疑蒼茫裏鬱島欲飛
去大塊怒天吳驚潮蕩雲路群真儼盈想一葦不
可渡惆悵赤城期願假輕鴻馭

東陽柳齋中詣南山招韋十

霽來海半山隱映城上起中峰落照時殘雪翠微
裏同心久爲別孤興那對此良會何遲遲清揚瞻
則邁

登勝果寺南樓雨中望嚴協律

微雨侵曉陽迴山半藏碧林端陟香榭雲外遲來

客孤村煖片烟去水生遠白但佳川原趣不覺城
池夕更喜舉中人清光漸咫尺

尋華山雲臺觀道士

秋日西山明勝趣引孤簪桃源數曲盡洞口兩岍
并還從罔象來忽得仙靈宅覓裳誰之子霞酌能
止客殘陽在翠微攜手更登歷林行拂煙雨溪望
亂金碧飛鳥下天窓巖松際雲壁稍尋玄蹤遠宛
入寥天寂願言葛仙翁終年鍊玉液

同李五夕次香山精舍訪憲上人

彼岸聞山鐘仙舟過苔水松門入幽映石逕趨迤

邈初月開草堂遠公方觀止忘言在閑夜凝念得
微理泠泠功德池相與滌心耳

夢尋西山準上人

別處秋泉聲至今猶在耳何嘗夢覓去不見雪山
子新月隔林時千峯一作鐘翠微裏言忘心更寂跡
滅雲自起覺來纒上塵如洗功德水

早渡伊川見舊隣作

鷓鴣鳴早霜秋水寒旅涉漁人昔鄰舍相見具舟
楫出浦興未盡向山心更愜村落通白雲茅茨隱
紅葉東臯滿時稼歸客欣復業

登覆釜山遇道人二首

晨策無涯名山深轉秀三休變覆景萬轉迷宇
宙攀崖到天窓入洞窮玉溜側逕蹲惟石飛蘿擲
驚欬花間鍊藥人雞犬和乳竇散髮便迎客采芝
仍滿袖郭璞賦遊仙始願今可就

真氣重嶂裏知君嘉遁幽山階壓丹穴藥井通伏
流道者帶經出洞中携我遊欲驂白蜺去且爲紫
芝留忽憶武陵事別家疑數秋

過溫逸人舊居

返真難合道懷舊仍無弔浮俗漸澆漓斯人誰繼

妙聲容在心耳寧覺阻言笑玄堂閉幾春拱木齊
雲嶠鶴傳若士舞猿得蘇門嘯酌酒片陽微空山
想埋照

過曹鈞隱居

荃蕙有奇性馨香道爲人不居累芳下寧老空林
春之子秉高節攻文還守真素書寸陰盡流水怨
情一作聲新濟濟振纓客煙霄各致身誰當舉玄
不使作良臣

過沈氏山居

雞鳴孤壘起靜者能卜築喬林出雲心閑門掩山

腹貧交喜相見把臂歡不足
空林閉戶言永日清
耳目泉聲吟轉粗
料氣香健健往往仙犬鳴
樵人
度爆竹酒醒出谷口
世網何難棄始願今不從
區折腰縣

罷章陵令山居過中峰道者二首

寧辭園令秩不改淵明調
解印無與言見山始一
笑幽人還幾境誰道苦奔峭
隨雲刺渡溪出門更
垂釣吾廬青霞裏
窓樹玄猿嘯微月清風來方知
散髮妙

丘壑趣如此暮年始棲偃
賴遇無心雲不笑歸來

晚鳴鳩拂紅枝初服傍清吹昨日山僧來猶嫌嘉
遁淺託君紫陽家路滅心更遠梯雲創其居抱犢
上絕巘杏田溪一曲霞境峯幾轉路石掛飛泉謝
公應在眼願言携手去採藥長不返

過瑞龍觀道士

不知誰氏子鍊魄家洞天鶴待成丹日人尋種杏
田靈山含道氣物性皆自然白鹿顧瑞草驪龍蟠
玉泉得茲象外趣便割區中緣石竇采雲母霞堂
陪列仙主人善止客柯爛忘歸年

同嚴逸人東溪泛舟

子陵江海心高跡此閑放漁舟在溪水曾是敦風
尚朝簪收雲物垂綸獨清曠寒花古岸傍唳鶴晴
沙上粉香好貞邇不遠來相訪已接方外遊仍陪
郢中唱歡言盡佳酌高興延秋望日暮浩歌還紅
霞亂青嶂

山居新種花藥與道士同遊賦詩

自樂魚鳥性寧求農牧資淺深愛巖壑疏鑿盡幽
奇雨花相助好鶯鳴春草時種蘭入山翠引葛上
花枝風露拆紅紫綠溪復映池新泉香杜若片石
引江蘿宛謂武陵洞潛應造化移杖策携煙客滿

袖餒芳蕤蝴蝶舞留我仙雞閑傍籬但令黃精熟
不慮韶光遲笑指雲蘿逕樵人那得知

東城初陷與薛員外王補闕暝投南山佛寺
日昃石門裏松聲山寺寒香雲空靜影定水無驚
湍洗足解塵纓忽覺天形寬清鐘揚虛谷微月深
重巒噫我朝露世翻波與浮瀾行運遘憂患何緣
親盤桓庶將鏡中象盡作無生觀

藍田溪與漁者宿

獨遊屢忘歸况此隱淪處濯髮清冷泉月明不能
去更憐垂綸叟靜若沙上鷺一論白雲心千里滄

唐書續編
洲趣蘆中夜火盡浦口秋山曙歎息分枝禽何時
更相遇

卧病李員外題扉而去

僻陋病者居蒿萊行遲失誰知簪紱貴能問幽憂
疾珂聲未駐門蘭氣先入室沉痾不冠帶安得候
蓬華清揚去莫尋離念頃來侵雀栖高窓靜日出
修桐陰枕上憶君子悄悄唯苦心

觀村人牧山田

六府且未盈三農爭務作貧民乏井稅墾土皆墜
鑿禾黍入寒雲茫茫半山郭秋來積霖雨霜降方

鉅獲中田聚黎甿反景空村落顧慚不耕者微祿
同衛鶴庶追周任言敢負謝生諾

長安旅宿

九秋旅夜長萬感何時歇蕙花漸寒暮心事猶楚
越直躬遭世道咫尺隔天闕每聞長樂鐘載泣靈
臺月明旦北門外歸途堪白髮

冬夜題旅館

退飛憶林藪樂業羨黎庶四海盡窮途一枝無宿
處嚴冬北風急中夜哀鴻去孤燭思何深寒窓坐
難曙勞歌待明發惆悵盈百慮

初黃綬赴藍田縣作

端木無匹伯終年棄山樊苦心非良知安得入君
門忽忝英達顧寧窺造化恩螢光起腐草雲翼騰
沉緼片石世可用良工心所存一叨尉京甸三省
懶黎元賢尹正趨府僕夫儼歸軒眼中縣胥色耳
裏蒼生言居人散山水卽景真桃源鹿聚入田逕
雞鳴隔嶺村食和俗久清到邑政空論且嘉訟庭
寂前階滿芳蓀

奉使採箭箬竹谷中晨興赴嶺

孤客倦夜坐聞猿乘早發背溪已斜漢登棧尚殘

月重峰轉森爽幽步更超越雲木聳鶴巢風蘿靜
虎穴人群徒自遠世役終難歇入山非買山采竹
異采蕨誰見子牟意怕勞書魏闕

夕發箭場巖下作

行役不遑安在幽機轉發山谷無明晦溪霞自興
沒朝櫛杉下風夕飲石上月懿爾青雲士垂纓朝
鳳闕寧知採竹人每食慚薇蕨

涿陽古渡作

日落問津處雲霞殘碧空牧牛避田燒退鵲隨潮
風翹首故鄉遠臨流此路窮翩翩青冥去羨彼高

飛鴻

唐德初鑾駕出關後登高愁望二首

長安不可望
望處邊愁起
輦轂混戎夷
山河空表裏
黃雲壓塞關
斜照移烽壘
漢幟遠成霞
胡馬來如蟻
不知涼庶戰
早晚蚩尤歿
渴日候河清
沉憂催暮齒

愁看秦川色
慘慘雲景晦
乾坤暫運行
品物遺覆載
黃塵漲戎馬
紫氣隨龍旆
掩泣指關東
日月妖氛外
臣心寄遠水
朝海去如帶
周德更休明
天衢佇開泰

自終南山晚歸

采苓日往還得性非樵隱白水到初澗青山辭尚
近絕境勝無倪歸途興不盡沮溺時返顧牛羊自
相引逍遙不外求塵慮從茲泯

登秦嶺半巖遇雨

屏翳忽騰氣浮陽慘無暉千峰挂飛雨百尺搖翠
微震電閃雲迴奔流翻石磯倚巖假松蓋臨水羨
荷衣不得采苓去空思乘月歸且憐東臯上秋色
侵荆扉

登玉山諸峰偶至悟真寺

郭南雲水佳，松簡野情發。紫芝每相引，黃綬不能
繼。稍入石門幽，始知靈境絕。冥搜未寸晷，仙逕俄
九折。蟠木盡石梁，崩岸露雲穴。數峰拔崑崙，秀色
與空敵。蒸氣襲晴虹，桂花留曙月。半巖採珉者，一
點如片雪。真實無前程，奇觀寧暫輟。更聞東林磬，
可聽不可說。興中尋覺化，寂爾諸象滅。

過桐栢山

秋風過楚山，山靜秋聲晚。賞心無定極，仙步亦清
遠。返照雲竇空，寒流石苔淺。羽人昔已去，靈跡欣
方踐。投策謝歸途，世緣從此遣。

仲春晚尋覆釜山

蝴蝶美和風飛花不知晚王孫尋芳草步步忘路
遠况我愛青山涉趣皆遊踐繁剋必中路陰晦陽
復顯古岸生新泉霞峰映雪巘交枝花色異奇石
雲根洩碧洞志忘歸紫芝之行可舉應嗤嵇叔夜林
卧方流酒

天門客題孫逸人石壁

崖石亂流處竹深斜照歸主人卧碻石心耳滌清
暉春雷遁作解空谷半芳菲雲棟綵甍宿藥圃蝴
蝶飛羣鳥暮暮幾夜瞻少微相見竟何說忘情

同息機

杪秋南山西峰題準上人蘭若

向山看霽色步步帶幽性返照亂流明寒空千嶂
淨右門有餘好霞殘月秋映上請遠公廬孤峰懸
一逕雲裏閑松下聞山磬客到兩忘言猿心
與靜定

歸龍寺題龍上人壁

寺卽神堯皇帝讀書之所龍飛後創爲精舍

入谷逢南花青綠引幽步招提饒泉石萬轉同一
趣向背森碧峯淺深羅古樹堯皇未登極此地曾
隱霧秘識得神謀因高思虎踞太陽忽臨照物象

俄光煦梵王宮始開長者金先布白水入禪境礪
山通覺路往往無心雲猶起潛龍處仍聞七祖後
佛子繼調御溪鳥投慧燈山蟬飽甘露不作解纓
客寧知捨筏喻身世已悟空歸途復何去

丁籤十七錢起之二

唐音統籤卷

二百四十二

五言古詩二

清泥驛迎獻王侍御

候館掃清晝使車出明光森森入郭樹一道引飛
霜仰視驄花白多慚綬色黃鵲鵲無羽翼願假憲
鳥翔

詔許昌崔明府拜補闕

儒者久營道詔書方問賢至精一耀世高步誰同
年何樹可棲鳳高梧枝拂天脫身是鳥裏載筆處
聞前日月傳軒后衣冠真列仙則知驪龍珠不

清冷泉才子貴難見郢歌空復傳惜哉效顰客心
想勞嬋娟

美楊侍御清文見示

伯牙道喪來絃絕無人續誰知絕唱後更有難和
曲層峰與清流逸勢競奔感清文不出戶仿佛皆
在目霧雪看滿懷蘭茝坐盈掬孤光碧潭月一片
崑崙玉初見歌陽春韶光變枯木再見吟白雪便
覺雲肅肅則知造化源方寸能展縮斯文不易遇
清爽心豈足願言書諸紳可以爲佩服

贈東鄰鄭少府

一聞白雪唱願見清揚久誰謂結綬來得陪趨府
後小邑藍溪上卑棲愜所偶妄言復連牆片月亦
携手草色同春逕鶯聲共高柳美景百花時平生
一盃酒聖朝大地以我爲芻狗秋滿歸白雲期
君訪谷口

田園雨後贈鄰人

安排常任性偃卧晚開戶樵客荷蓑歸向來春山
雨殘雲虹未落返景霞初吐時鳥鳴村墟新泉遶
林圃堯年尚恬泊鄰里成太古室邇人遂遙相思
怨芳杜

長安客舍贈李行父明府

藏器偶時少知人自古難遂令丹穴鳳晚食金琅玕
誰謂兵戈際鳴琴方一彈理煩善用簡濟猛能兼寬
夙夜念黎庶寢興非宴安洪波未靜壑何樹不驚鷺
鳬鳥傍京輦卬心懸灌壇高槐暗苦雨長劍生秋寒
旅食還爲客饑年亦盡歡親勞携斗水往往救泥蟠
但恐酬明義蹉跎芳歲闌

客舍贈鄭賁

結交意不薄匪席言莫違世義隨波久人生知己
稀先鳴誓相達永遇還相依一望金門詔三看黃

鳥飛瞑投同旅食朝出易儒衣
藉向林廬接携手
行將歸

贈栢巖老人

日與塵塵相背
寶山叟
麗眉忽相見
避世一何
久
林栖古崖幽
野事佳
春後瓠葉覆
荆扉
粟苞垂
甕
歸獨歌
還獨酌
不耕亦不耦
硤田隔雲溪
多雨
長種芳煙霞
解情性
身世同
芻狗寄
謝營道人
天真此翁有

謝張法曹萬頃小山假景見憶

樂道隨去處
養和解
朝簪茅堂近
丹闕佳
致亦何

深退食不趨府忘機還在林清風亂流上永日小
山陰解襪雨中竹將離花際禽物華對幽寂絃酌
兼詠吟自昔仰高步及茲勞所欽野歌叨繼組知
已復知音

奉和張荆州趙農晚望

太清霽雲雷陽春南物象明牧行春令仁風助昇
長時和俗勤業播植應厭壤陰陰桑陌連漠漠水
田廣郡中忽無事方外還獨徃日暮駐歸軒湖山
有佳賞宣城傳逸韻千載誰此響

謝王維春夜竹亭贈別

山月隨客來主人興不淺今宵竹林下誰覺花源
遠惆悵曙鶯啼孤雲還絕巘

酬陶六辭秩歸舊居見東

靖節昔高尚令孫嗣清徽舊廬雲峰下獻歲車騎
歸去俗因解綬憶山得採薇田疇春事起里巷相
尋稀淵明醉乘興閑門祗掩扉花禽驚曙月鄰女
上鳴機畢娶願已果養恬志寧違吾當掛朝服同
爾緝荷衣

卧疾答劉道士

白露蠶已絲空林日淒清寥寥畫扉掩獨卧秋窓

唐音續集
明賢字比仙藥羽人寄柴荆長吟想風馭恍若升
蓬瀛

遊輞川至南山寄谷口王十六

山色不厭遠我行隨處深
蹟幽青蘿逕思絕孤霞岑
獨鶴引過浦鳴猿呼入林
褰裳百泉裏一步一清心
王子在何處隔雲雞犬音
折麻定延佇乘月期招尋

藍溪休沐寄趙八給事

蟲鳴歸舊里田野秋農閑
卽事敦風尚衡門方再關
夕陽入東籬爽氣高前山
霜蕙後時老巢禽知

曉還侍臣黃樞寵鳴玉青雲間肯想觀魚處寒泉
照髮斑

離居夜雨奉寄李京兆

永夜不可度蛩吟秋雨滴寂寞想章臺始歎雲泥
隔雷聲匪君車猶持過我廬電影非君燭猶能明
我目如何瓊樹枝夢裡看不足望望佳期阻愁生
寒草綠

谷口新居寄同省朋故

種黍傍煙溪憐蕪兼沮洳亦知主計薄所貴隱身
處橡栗石上村莓苔水中路蕭然授衣日得此還

唐音續集
山趣汲井愛秋泉結茅因古樹閑雲與幽鳥對我
不能去寄謝鴛鴦群狎鷗拙所慕

東臯早春寄郎四校書

祿微賴學稼歲起歸衡茅窮達戀明主耕桑亦近
邠夜來霽山雪陽氣動林梢蘭一作蕙暖初吐春

鳩鳴欲果蓬萊時入夢知子憶貧交

獨往覆釜山寄郎士元

賞心無遠近芳月好登望勝事引幽人山下復山
上將尋洞中藥復愛湖外峰古壁苔入雲陰溪樹
穿浪誰言世緣絕更惜知音曠鶯啼綠蘿春迴首

還惆悵

山中春仲寄汝上王恒穎川沈冲

隱者守恬泊春山日深淨誰知蟠木材得性無人
境座隅泉出洞竹上雲起嶺饑犬入山厨飲虹過
藥井前溪堪放逸仲月好風景遊目來遠思摘芳
寄汝穎

海上卧病寄王臨

離客窮海陰蕭辰歸思結一隨浮雲滯幾怨黃鵠
別妙年卽沉痾生事多所闕劍中負明義枕上惜
玄髮之子良史才華簪偶時哲相思千里道愁望

飛鳥絕歲暮冰雪寒淮湖不可越百年去心慮孤
影守薄劣獨餘慕侶情金石無休歇

寄任山人

天階崇黼黻世路有趨競獨抱中孚爻誰知苦寒
詠行潦難朝涉散材空遇聖豈無鳴鳳時其如問
津命所思青山郭再夢綠蘿逕林泉春可遊羨爾
得其性

東陵藥堂寄張道士

水落蒼山空當軒秋水色清旦振衣坐永吟意何
極願言金丹壽一假鸞鳳翼日夕開真經言忘心

更默玄都有仙子採藥早相識煙路難再期焚香
空歎息

淮上別范大

悲風隕涼葉送歸怨南楚窮年將別離寸晷申宴
語長淮流不盡征棹忽復舉碧落半愁雲黃鶴時
顧侶遊宦且未達前徒各修阻分袂一相嗟良辰
更何許

送李大夫赴廣州

一賢間氣生麟趾鳳凰羽何意人之望未爲王者
輔出鎮忽推才盛哉文且武南越寄維城雄雄推

甲兵鼓門通幕府天井入軍營厥俗多豪侈古來
難致禮唯君飲水心可酌貪泉水忠臣感聖君徇
義不邀勳龍鏡迷山魅霜風破嶂雲征途凡幾轉
魏闕如在眼向郡海潮迎指鄉關樹遠按節化旣
聞下車佳政新當令尉陀俗還作上皇人支離交
俊哲弱冠至華髮昔許霄漢期今嗟鵬鷁別圖南
不可御惆悵守薄劣

送李四擢第歸覲省

當年貴得意文字各爭名齊唱陽春曲唯君金玉
聲懸黎寶中出高價世難掩鴻羽不低飛龍津徒

自險直矜鸚鵡賦不貴芳桂枝少俊蔡邕許長鳴
唐舉知梁城下熊軾朱戟何曄耀才子欲歸寧棠
花已含笑高門知慶太子孝覺親榮獨攬還珠美
寧唯問絹情離筵不盡醉操袂一何早馬蹄西別
輕樹色東看好行塵忽不見惆悵青門道

送虞說擢第南歸覲省

南風起別袂心到衡湘間歸客楚天遠孤舟雲水
閑愛君採蓮處花島連家山得意且寧省人生能
幾還

送王季友赴洪州幕下

唐音續集
列郡皆用武南征所從誰諸侯重才畧見子如瓊
枝撫劍感知已出門方遠辭煙波帶幕府海日生
紅旗問我何功德負恩留玉墀銷魂把別袂愧爾
酌明時

送薛判官赴蜀

橫笛聲轉悲羽觴酣欲別舉目叩關遠離心不可
說邊陲勞帝念日下降才傑路極巴水長天銜劍
峯缺單車動夙夜越境正炎節星橋過客稀火井
蒸雲熱陰符能制勝千里在坐夾始見儒者雄長
纓紫餘孽

送張少府

愁雲破斜照別酌勸行子蓬驚馬首風鴈拂天邊
水寸晷如三歲離心在萬里

送包何東遊

水國嘗獨往送君還念茲湖山遠近色昏旦煙霞
時子好謝公跡常吟孤嶼詩果乘扁舟去若與白
鷗期野趣及春好客遊欣此辭入雲投館僻采碧
過帆遲江上日回首琴中勞別思春鴻刷歸翼一
寄杜蘅枝

歎畢少府以持法無隱見繫

唐書續錄
用法本禁邪盡心翻自極畢公在囹圄世事何紉
纏翠鳳呈其瑞虞羅寄鍛翼囚中千念時窓外百
花色落景閉園扉春蟲網叢棘古人不念文紛淚
莫沾臆

京兆尹廳前甘棠樹降甘露

內史用堯意理京宜惠慈氣和祥則降孰謂天難
知濟旱露爲兆有如頌應麓豈無天桃樹洒此甘
棠枝玉色與人爭珠光臨筆垂協風與之俱物性
皆熙熙何必鳳池上方看作霖時

裴侍郎湘川廻以青竹筒相遺因而贈之

楚竹青玉潤從來湘水陰緘書取直節君子知虛
心入用隨憲簡積文不受金體將丹鳳直色映秋
霜深寧肯假伶倫謬爲龍鳳吟唯將翰院客昔秘
瑤華音長跪捧嘉貺歲寒慚所欽

白石枕

并序

起與監察御史畢公耀交之厚矣頃於藍水得
片石皎然霜明如其德也許爲枕贈之及琢磨
將成炎暑已謝俗曰猶班女之扇可退也君
子曰不然此真畢公之佳賞也故珍而賦之

琢珉勝水碧所貴素且貞曾無白珪玷不作浮磬
鳴捧來太陽前一片新冰清沉沉風憲地待爾秋
已至璞堅難爲功誰怨晚成羈比德無磷緇論交

亦如此

丁籤十七錢起之三

唐音統籤卷

二百四十三

七言古詩

行路難

君不見明星映空月
太陽朝升光盡歇
君不見凋零委路蓬
長風飄舉入雲中
由來人事何嘗定
且莫驕奢笑賤窮

效古秋夜長

秋漢飛玉霜
北風掃荷香
含情紡織孤燈盡
拭淚相思寒漏長
簷前湛雲靜如水
月弔棲烏啼鳥起
誰家少婦事鴛機
錦幕雲屏深掩扉
白玉窓中聞

落葉應憐寒女獨無衣

秋霖曲

君不見聖主旰食憂元元秋風苦雨暗九門鳳凰
池裏沸泉騰蒼龍闕下生雲根陰精離畢太淹度
倦鳥將歸不知樹愁陰慘淡時殷雷生靈墊溺若
寒灰公卿紅粒饜丹桂黔首白骨封青苔貂裘玉
食張公子魚炙熏天戟門裏且如歌笑日揮金應
笑禹湯能罪已鶴鳴蛙躍正及時豹隱蘭凋亦可
悲焉得太阿決屏翳還令率土見朝曦

病鶴篇

獨鶴聲哀羽摧折沙頭一點留殘雪三山侶伴能
遠翔五里徘徊忍爲別驚群各畏野人機誰肯相
將霞水飛不及川鳬長比翼隨波雙泛復雙歸碧
海滄江深且廣目盡天倪安得往雲山隔路不隔
心宛頸和鳴長在想何時白霧捲青天接影追飛
太液前

紫參歌

并序

紫參幽芳也五葩連萼狀飛禽羽康俗名之五
鳥花起故山道人蘭若尤豐此藥校書劉公詠
歌之俾
予繼組

遠公林下滿青苔春藥偏宜間石開往往幽人尋

水見時時仙蝶隔雲來陰陽雕刻花如鳥對風連
雞一何小春風宛轉虎溪傍紫翼紅翹翻霽光貝
葉經前無住色蓮花會裡暫留香蓬山才子憐幽
性白雪陽春動新詠應知仙卉老雲霞莫賞天桃
滿蹊逕

鋤藥詠

蒔藥穿林復在巘濃香秀色深能淺雲氣垂來裏
露偏松陰占處知春晚拂曙殘鶯百轉催縈泉帶
石幾花開不隨飛鳥緣枝去如笑幽人出谷來對
之不覺忘疎懶廢卷荷鋤嫌日短豈無萱草樹堦

堪惜爾幽芳世所遺但使芝蘭出蕭艾不辭手足
皆胼胝寧學陶潛空嗜酒頽齡捨此事東菑

片玉篇

至寶未爲代所竒韞靈示璞荆山隔獨使紅光天
子識不將清韻世人知世人所貴惟燕石美玉對
之成瓦礫空山埋照凡幾年古色蒼痕宛自然重
溪暮暮暗雲樹一片熒熒光石泉美人之鑒明且
徹玉指提携歎奇絕試勞香袖拂莓苔不覺清心
皎冰雪連城美價幸逢時命代良工豈見遺試作
珪璋禮天地何如孺瑋在堦墀

瑪瑙杯歌

瑤溪碧岸生奇寶，剖質披心出文藻。良工雕飾明
且鮮，得成珍器入芳筵。含華炳麗金罇側，翠華瓊
觴忽無色。繁絃急管催獻酬，倏若飛空生羽翼。璚
璚蘭英照豹斑，滿堂詞客盡朱顏。花光來去傳香
袖，霞影高低傍玉山。王孫彩筆題新詠，碎錦連珠
復輝映。世情貴耳不貴奇，謾說海底珊瑚枝。寧及
琢磨當妙用，燕歌楚舞長相隨。

畫鶴篇省中作

點素凝姿任畫工，霜毛玉羽照簾櫳。借問飛鳴華

表上何如粉纈彩屏中文昌宮近芙蓉闌闌室綰
縕香且結鑪氣朝成緱嶺雲銀燈夜作華亭月日
暖花明梁燕歸應驚片雪在仙闌主人顧盼千金
重誰肯徘徊五里飛

山中寄時校書

蓬來紫氣漏如玉唯予知爾陽春曲別來幾日芳
蓀綠百花酒滿不見君青山一望心斷續

賦得青城山歌送楊杜二郎中赴蜀軍

蜀山西南千萬重仙經最說青城峰青城嶽岑倚
空碧遠壓蛾眉吞劍壁錦屏雲起易成霞玉洞花

唐書續編
明不知夕星臺二妙逐王師阮瑀軍書王粲詩日
落猿聲連玉笛晴來山翠傍旌旗綠蘿春月營門
近知君對酒遇相思

送崔校書從軍

鴈門太守能愛賢麟閣書生亦投筆寧唯玉劍報
知己更有龍韜佐師律別馬連嘶出御溝家人幾
夜望刀頭燕南春草傷心色薊北黃雲滿眼愁聞
道輕生能擊虜何嗟少壯不封侯

送傅管記赴蜀軍

終童之苑誰繼出燕領儒生今倭逸主將早知鸚

鵠賦飛書許載蛟龍筆峨眉玉壘指霞標鳥沒天
低幕府遙巴山雨色藏征旆漢水俱聲咽短簫賜
壁腰金應可料才略縱橫年且妙無人不重樂毅
賢何敵能當魯連嘯日暮黃雲千里昏壯心輕別
不銷寬勸君用却龍泉劍莫負平生國士恩

盧龍塞行送韋掌記

雨雪紛紛黑山外行人共指盧龍塞萬里飛沙咽
鼓鑿三軍殺氣凝旌旆陳琳書記本翩翩料敵張
兵奪酒泉聖主好文兼好武封侯莫比漢皇年

送張將軍征西

長安少年唯好武金殿承恩爭破虜沙場烽火隔
天山鐵騎征西幾歲還戰處黑雲霾瀚海愁中明
月度陽關玉笛聲悲離酌晚金方路極行人遠計
日霜戈盡敵歸回首戎城空落暉始笑子卿心計
失徒看海上節旌稀

送畢侍御謫居

崇蘭香歟玉簪折志士吞聲甘狗節忠藎不爲明
主知悲來莫向時人說滄浪之水見心清楚客辭
天淚滿纓百鳥喧喧噪一鶚上林高枝亦難托寧
嗟人世棄虞翻且喜江山得康樂自憐黃綬老嬰

身妻子朝來勸隱淪桃花洞裏舉家去此別相思
復幾春

送馬明府赴江陵

陶令南行心自永江天極目澄秋景萬室遙知犬
不鳴雙鳬下處人皆靜清風高興得湖山門柳蕭
條雙翟閑黃花滿把應相憶落日登樓北望還

送修武元少府

寸祿榮色養此行寧歎惜自今黃綬采蘭時不厭
丹墀芳草色百戰荒城復井田幾家春樹帶人烟
黎甿久厭蓬飄苦遲爾西南惠月傳

送崔十三東遊

千里有同心十年一會面
當杯緩筆柱倏忽催離
宴丹鳳城頭噪晚鴉
行人馬首夕陽斜
灞上春風留別袂
關東新月宿誰家
官柳依依兩鄉色
誰能此別不相憶

送鄒三落第還鄉

鄒客文章絕世稀
常嗟時命與心違
十年失路誰知己
千里思親獨遠歸
雲帆春水將何適
日愛東南暮山碧
關中新月對離樽
江上殘花待歸客
名宦無嫌自古遲
窮途此別不堪悲
荷衣垂釣且安

命金馬招賢會有時

送褚大落第東歸

離琴彈苦調美人慘向隅
頃來荷策干明王還復
扁舟歸五湖濃家側席明敷久豈意遺賢在林藪
玉堂金馬隔青雲墨客儒生皆白首昨夢芳洲采
白蘋歸期且喜故園春稚子只思陶令至文君不
厭馬卿貧剡中風月久相憶池上鶯花應再得酒
熟寧孤芳杜春詩成不枉青山色念此那能不羨
歸長楊諫獵事皆違他日東流一乘興知君爲我
掃荆扉

哭曹約

苦節推白首憐君負此生忠藎名空在家貧道不
行朝來相憶訪蓬華只謂淵明猶卧疾忽見江南
弔鶴來始知天上文星失嘗恨知音千古稀那堪
夫子九泉歸一聲隣笛殘陽裏醉酒空堂淚滿衣